

奉康學
治錄

傅天弼

署簽

奉 康 學
治 錄

傅天弼

署簽

清宣統三年六月初版
中華民國三年四月重訂
中華民國八年七月三版



著者
皖青陳嘉言

印刷所
京師第一監獄



奉康學治錄



影 小 青 嘯

許序

友人陳君嘯清出其奉康學治錄問序於余余因語嘯清曰君殆以學爲治者也嘯清乃婉而謝曰學爲治嗚呼如嘯清者是眞賢牧令也余烏可已於言乎夫州縣者親民之官也民者國之本也牧令賢則民治牧令否則民亂民亂則國亂民治則國治牧令一官其關係國家之安危重要如此是以漢之上考首列郡縣唐之刺史入爲三公蓋治國之道未有不從郡縣始也今也不然上之視牧令卑且賤矣牧令之自視亦多以爲無足輕重矣奉檄而來趾高氣揚不學無術冒昧從事問以法律不知也問以學務不知也問以巡警不知也問以自治不知也問以財政不知也苟合取榮殘慘貪酷上失其道民散久矣此吏治之所以蠹敗民生之所以彫敝國勢之所以日卽危亡也噫民爲邦本本固邦寧奈何今之執政者徒汲汲於管官之官無事之官而於親民官則概不加意焉以是而欲求治是何異立朝夕於運鈞之上

擔竿而求其末蓋不可得也嘯清賢乎哉曩讀其治東八策杞憂芻言兩書竊謂其有經世之學今果見諸寔行矣以奉康頑僊之區而嘯清獨能苦口勸導使民治大有可觀至今鄉民猶稱道弗衰詩曰愷悌君子民之父母嘯清有焉推此道也擴此志也以之治國治天下亦何不可嘯清勉乎哉宣統辛亥七月建德許世英序

房序

友人陳君嘯清負經世略喜政治家言官東五載歷知奉化康平兩縣事所至有能聲近褒輯其手擬稿件成學治錄一冊屬序於予予與嘯清相交最久亦相知最深是烏可以不文辭哉憶庚子歲予與嘯清同肄業於皖中敬敷書院維時同學攻帖括嘯清獨喜古文辭暨一切經世有用之書北氛日惡一夕數驚同學多棄業逃歸嘯清與予獨留滯院中不肯去每至夕陽在山清風微拂相與登重岡據危石俯菱湖清漪望龍山暝色慨然談天下事仰天畫地幾有不可一世之雄者其後予以奔走學務東渡攷求嘯清從宦遼東兩人不相見者數載戊申春薄游遼瀋乃得親覩其所設施回憶嘯清曩時所自期許知其所出以問世者不過一鱗一爪小用小效焉耳烏足以盡其胸中鬱勃之奇哉然卽此已非俗吏之所能爲此嘯清所以褒輯是錄而予序此又不能無慨然有感者也夫牧令親民之官也不得其人民不可

得而治東省郡邑類多新置民尤樸野不可以法懲嘯清獨苦口勸導平易
近人喻之以理感之以情卽至奉康荒陋瘠苦之區而文化治理猶復蒸蒸
日上此在嘯清雖不必以此矜表見要爲吾民計固樂有此賢牧令矣乃並
區區一邑亦不能使竟其所施吾又不知當時之號稱賢牧令者其所設施
較吾嘯清顧爲何如是甯獨嘯清一人之不幸耶嘯清勉之宏此遠謀儲爲
大用區區是錄余固不僅以此許嘯清嘯清又甯僅以此自許乎哉是爲序
辛亥初秋同學弟房宗嶽識

汪序

光緒丙午予載筆游關東因童君汝川而識青陽陳君嘯清明年大府委君署奉化縣事已酉再署康平所至輒有聲譽去歲結伴東游日本君亦參與其列共朝夕者月餘尤沃聞君之偉略君在官時所爲演說諭告此邦人士率不以膚泛文章視之蓋君治事以誠故出語皆由衷而發吾報有演說壇一欄嘗以君之文稿實之非敢標榜將以廣流傳資規仿也顧錯雜登載繙閱滋難近聞君有編輯奉康學治錄之舉可謂實獲我心世有同情者其歡迎之忱當亦不下於予也時宣統三年閏六月旌德汪洋拜識

奉康學治錄 汪序

陳序

宣統辛亥夏六月宗兄嘯清明府將有奉康學治錄之刻而由瀋陽差次以書來曰爲我序之余老學究也何足與論治抑余惟二帝三王之治歷世雖更衰亂而當我朝康乾間明教化修法度遠人慕義莫不賓服百家衆說怪奇可喜之談未有能橫出其間煊其所長而矜其所得者邗治之隆誠哉軼漢唐而上之當是時爲牧令者從容少事但使載以清靜守法便民則循吏也近自道咸以降時局日非門戶開競爭烈世界愈進於文明而優勝劣敗遂確定爲公例自京朝以逮州縣因時制宜與民更始汲汲乎圖挽救之策日不暇給也有官守者匪特充位備員偷活取容爲時所擯即清勤慈惠若古時廉叔度郭細侯其人無慙良吏矣然試起漢時治行課第一諸人使處今日內外交迫風潮潛湧時而不諳五州強弱之大勢不察國民爭存之原理不洞悉政治統一之本源雖良吏猶庸材耳若明府之輯是錄合觀其演

說公牘示諭函件類能一掃腐氣獨竭苦心宜其出宰兩邑百廢俱舉卓著能聲矣至明府生平辦事激發以熱忱幹濟以毅力尤出至性絕非有待於學而出於矯也雖然是錄也曷言乎學治蓋自中國有史以來紀事紀言盈千累萬陳陳相因率常例耳而欲破除積習振刷精神就今日之新政批其郤導其竅如屠牛坦之解牛奏力砉然一朝解十二牛而芒刃不缺譚何容易而况權篆下邑復有七八級之長官遞臨其上動輒爲法所束縛而又事事在創見駭聞中者哉顏曰學治蓋明府自道其困難非撝謙乃紀實也余嚮讀其東游考察日記查勘禁煙日記以及治東八策杞憂芻言等著固已佩之願附書數言於其後末由也茲者辱承委命輒敢恃愛貢愚爲道初盛之治如彼晚近之治如此以明夫牧令之才之在今日之不易得其有以仰稱高明之懷否也請還以質之時宣統三年又六月宗弟懷平熙齋氏拜撰

自述

予年四十從政已五閱寒暑矣先是丙午夏四月赴引入都友人鄒君舒翹邀作關東游藉以考查壹是維時東省乘庚子甲辰之後民生狀況地理險隘與夫日俄戰爭之故址察視所及靡不筆而記之事竣謁

留守襄平趙公公顧不以爲不才勉而留之踰年三月檄署奉化縣事戊申十月卸篆己酉七月復奉檄署康平縣事次年九月期滿調省綜計此兩任內凡親擬稿件如白話演說白話示諭暨一切函牘苟於國計民生稍稍有裨益者咸經署友王君敬廷私錄成帙而例行案牘不與焉因念古人有言學而後入政未聞以政學矧值今茲新政旁午以余謏薄治事兩邦安能謂所設施犁然悉當表而出之母亦徒資世人姍笑而已雖然不顧人姍笑而自銜其醜其醜固不可掩若因恐人之姍笑而遂自匿其醜其醜不終無可改乎且存此已往之陳述作將來之考鏡亦吾個人半生之行歷耳姍笑與

否又何不可聽之人哉爰詮次舊稿別其類爲演說爲公牘爲示諭爲函件
合名之曰奉康學治錄云辛亥六月嘉言自識於瀋陽寓次

重訂述言

光陰荏苒余解二次康平篆忽忽又三年矣內顧諸己外顧諸人冥心索隱老大之悲今昔之感寧能已哉然聞昔賢有言藥能治病書能養心今余年逾強仕書既悔不十年讀而此虛靈不昧耿耿之寸心詎肯放而弗養使不爲我用哉一日正思所以善養方法適有平素之某友至詢余何冥想若此余告以故友乃續謂曰君雖不能讀古人書奚不將個人已往編輯奉康學治錄一書手事披覽譌舛而校正之遺漏而增刊之以爲養心之助也予曰子言誠然予將從事於是並前在奉化任內未輯之文及二次康平任內新布之令繼續加入雖曰無裨世用而藉此修養乃心亦以自鏡得失云爾

中華民國三年四月嘉言再識

奉康學治錄重訂述言

